



**REGOLAMENT PE CONCESSION DAL PATROCINI MORÂL DE  
ARLEF - AGJENZIE REGJONÂL PE LENGHE FURLANE**

*Fat bon cu la Deliberazion dal Consei di Aministrazion n. 16 dai 7 di Jugn dal 2011, po dopo modificât cu la Deliberazion dal Consei di Aministrazion n. 8 dai 31 di Zenâr dal 2022 e cu la Deliberazion dai Consei di Aministrazion n. 22 dai 2 di Mai dal 2024.*

## **Regolament pe concession dal patrocini morâl de ARLeF**

Art. 1 Finalitâts dal regolament

Art. 2 Patrocini

Art. 2-bis Partenariât

Art. 3 Criteris pe concession dal patrocini

Art. 4 Sogjets organizadôrs o promotôrs di iniziativis di patrocinâ

Art. 5 Recuisîts e cundizions pal ûs dal patrocini di bande di sogjets esternis

Art. 6 Concession dal patrocini e autorizazion al ûs dal logo de ARLeF

Art. 7 Modalitâts di domande dal patrocini ae ARLeF

Art. 8 Controi

Art. 9 Menzion no autorizade de ARLeF tant che ent patrocinant

### **Art. 1 Finalitâts dal regolament**

1. Chest regolament al dissipline i criteris e lis modalitâts pe concession dal patrocini morâl de ARLeF –Agenzie Regjonâl pe Lenghe Furlane.

### **Art. 2 Patrocini**

1. Il patrocini de ARLeF al constituîs une atestazion di poie morâl de Agenzie par iniziativis stimadis vlevulis pes lôr finalitâts che a integnin la lenghe e la culture furlane o a altris lenghis e culturis minoritariis.

2. Par “iniziativis” si intindin ativitâts inmaneadis di tierçs, tant che events, cunvignis, mostris, publicazions, concors e altris progjets.

3. Il patrocini al è concedût simpri e dome cun riferiment ae iniziative o ae opare specifiche che par chê al è stât domandât, e dome pal timp che al corispuint ae iniziative o ae durade de opare.

4. La ARLeF e concê il so patrocini dome a titul gratuit, vâl a dî cence concession di contribûts o di vantaçs economics.

### **Art. 2-bis Partenariât**

1. La ARLeF e pues concedi il partenariât a sogjets che a concludin insiem cu la Agenzie ativitâts e compits par realizâ il progjet.

2. La ARLeF e concê il so partenariât, tes iniziativis che a previodin cheste forme di poie, dome in forme gratuite. Al pues jessi previodût, se a son lis cundizions, un supuart organizatîf pe realizazion o pe promozion de iniziative stesse, intes formis e intes modalitâts concludadis prime cul sogjet interessât.

3. L'ent che al fâs la richieste al mande ae Agenzie la domande di concession di partenariât vie PEC o vie pueste eletroniche, almancul 30 dîs prime de scjadince che l'ent stes al met cuant che al compile il modul di pueste.

4. Par chest istitût a valin, cuant che si puedin aplicâ, lis stessis normis dal patrocini.

### **Art. 3 Criteris pe concession dal patrocini**

1. La concession dal patrocini e je decidude dal President de Agenzie cun valutazions che a tegnin cont di chescj criteris:

- coerence de iniziative cu lis finalitâts istituzionâls de Agenzie, valutate cun riferiment ai ambits gjenerâi di ativitât, aes liniis di azion consolidadis, ai programs

e ai progjets de Agjenzie;

- relevance cualitative de iniziative pe comunitât furlane;
- impuartance e coerence tra la iniziative e la imagjin de ARLeF, valutade in misure de varietât e des potenzialitâts di difusion dal messaç e dai imprescj di comunicazion di doprâ.

#### **Art. 4 Sogjets organizadôrs o promotôrs di iniziativis di patrocinâ.**

1. Il President al concêt il patrocini de Agjenzie par iniziativis inmaneadis di:

- aziendis e ents publics o privâts.
- associazions, comitâts e fondazions cence fins di vuadagn e altris organisims no profit;

#### **Art. 5 Recuisîts e cundizions pal ûs dal patrocini di bande di sogjets esternis**

1. L'ûs di bande di sogjets esternis, su documents e materiâi di cualsei fate, di formulis tant che "cul patrocini de Agjenzie Regionâl pe Lenghe Furlane" o similis al è pussibil dome daûr de concession dal patrocini di bande dal President, tal rispjet des proceduris descritis in chest regolament.

#### **Art. 6 Concession dal patrocini e autorizazion al ûs dal logo de ARLeF**

1. La concession dal patrocini di bande de Agjenzie par une iniziative no autorize il sogjet che le inmanee a doprâ il logo de Agjenzie, ancje dome pe stesse iniziative che al è stât domandât il patrocini.

2. Il sogjet interessât a doprâ il logo de ARLeF par une iniziative patrocinade al à di domandâ in maniere specifiche il permès di doprâ il logo stes, mandant in maniere preventive, par cjapânt vision, i materiâi dulà che al varà di jessi doprât.

#### **Art. 7 Modalitâts di domande dal patrocini ae ARLeF**

1. Il legâl rapresentant dal sogjet interessât a vê il patrocini de ARLeF par une iniziative che al à inmaneat o promovût, al à di mandâ ae Agjenzie une domande di concession di patrocini vie PEC o par pueste eletroniche, almancul 30 dîs prime de iniziative, infôr che pai câs urgjents, midiant de compilazion dal modul di domande che si pues cjatâ tal sît internet de Agjenzie.

2. Il modul di domande specificât tal come 1 al à di vê chestis informazions:

- a) descrizion dal sogjet che al fâs domande e des sôs ativitâts;
- b) motivazion e obietîfs de iniziative e so impat potenziâl;
- c) program di massime de iniziative (date, oraris, liste dai relatôrs e partecipants e lis istituzions o sogjets che a rapresentin);
- d) indicazion di chei altris sogjets publics o privâts che l'organizadôr de iniziative ur à domandât o al intint domandâ il patrocini pe iniziative;
- e) indicazion di chei altris sogjets publics o privâts che l'organizadôr de iniziative al à cjapât dentri o che al intint coinvolzi in cualsei forme te iniziative;
- f) indicazion dai struments di comunicazion principâi che si intint doprâ par publicizâ la iniziative;
- g) domande di podê doprâ il logo de ARLeF.

3. Il President, dopo valutade la documentazion rivade, al decêt in maniere insindicabile se concedi il patrocini ae iniziative, e salacor, daûr di cualis specifichis cundizions. In câs di decision positive di bande dal President, si trasmet une comunicazion di concession dal patrocini.

**Art. 8 Controi**

1. La ARLeF e pues fâ controï par sigurâ l'ûs coret de concession dal patrocini.

**Art. 9 Menzion no autorizade de ARLeF tant che ent patrocinant**

1. Tal câs di menzon no autorizade de Agenzie tant che ent patrocinant di une iniziative, la ARLeF a 'nt domande la cessazion imediade, la distruzion dai materiâi là che e je presinte la menzon e il risarciment dal dam, se dal câs.